

P R Æ F A T I O

& obliquos recte expediverint, nisi ex cæli ad diversas terræ plagas relatione, ac intuitu. Medicus, ut medicinam faciat, non omnem omnibus terræ regionibus convenire ex Hippocrate discet; nec eandem esse ubique herbarum, stirpium, seminum, animalium, venenorum vim ac indolem. Theologus rerum creatarum amplitudinem, peregrinationes Abrahami, Salomonis in Ophir profectionem, Pauli per Asiam & Europam iter, Patriarcharum, Prophetarum, Christi Servatoris, Apostolorum, habitatione, oraculis ac miraculis celebra loca, in Geographorum tabulis quærit & invenit. Quæ omnia & singula clarissime docent, quanta sit Tabularum Geographicarum necessitas & utilitas. Quarum ope adjuti, quæ foris sunt & procul posita, domi ante oculos videmus: montes invios transcendimus, maria fluminaque sine periculo trajicimus: & absque viatico orbem omnem peragramus; iterque ab Occidente in Orientem, à Septentrione in Austrum, celerrimo oculorum jactu animique motu conficimus. Et quid magis volupe? quam regum, principum, ducum, regna ditio- nesque coram intueri: urbium pagorumque situs, distantiasque nosse: flumina, portus, sinus, promontoria terrarum observasse: singularum adhæc regionum, & populorum indolem, mores,

Et quid quæque ferat regio, & quid ferre recuset, ex tabulis & adjunctis descriptionibus perspexisse. Orbi terrarum Tabulas dederunt Veteres, dederunt Novi ac recentiores Geographi. Inter veteres post Hipparchi & Marini Tyrii operas, facem præfert nobis Cl. Ptolemæus, cujus nisi juvaremur laboribus, in tenebris versaretur etiamnum & alta caligine Geographia. Inter recentiores non exiguam hisce studiis laudem meruerunt Abrahamus Ortelius & Gerardus Mercator, ille Regis Hispaniarum, hic Cliviæ Ducis Geographus: quos veluti duces secuti sunt viri doctissimi Guilj. Camdenus, Ioh. Antonius Maginus, P. Merula, P. Bertius, Philippus Cluverius, aliique. Horum exemplis excitati eundem Terrarum orbem orbi damus, tabulis ut plurimum